

歸有光全集

3

新刊全補通鑑標題摘要(三)
三吳水利錄

歸有光全集

3

新刊全補通鑑標題摘要(三)
三吳水利錄

图书在版编目(CIP)数据

归有光全集 / (明)归有光撰;严佐之,谭帆,彭
国忠主编. —上海:上海人民出版社,2015
ISBN 978-7-208-13353-2

I. ①归… II. ①归… ②严… ③谭… ④彭… III.
①中国文学—古典文学—作品综合集—明代 IV.
①I214.82

中国版本图书馆 CIP 数据核字(2015)第 244886 号

策 劃 王 清 陳 益

責任編輯 黃玉婷 張鈺翰
封面設計 傅惟本

歸有光全集

(全十冊)

[明] 歸有光 撰

嚴佐之 譚 帆 彭國忠 主編

世紀出版集團

上海人民出版社出版

(200001 上海福建中路 193 號 www.ewen.co)

世紀出版集團發行中心發行

浙江新華數碼印務有限公司印刷

開本 890×1240 1/32 印張 168.25 插頁 50 字數 3,803,000

2015 年 12 月第 1 版 2015 年 12 月第 1 次印刷

ISBN 978-7-208-13353-2/K·2447

定價 960.00 圓

本册總目

新刊全補通鑑標題摘要(三) 一二三九

三吳水利錄 一七一七

新刊全補通鑑標題摘要(三)

趙厚均 校點

卷十九

五代

梁唐晉漢周

後梁紀

太祖皇帝

名溫，姓朱氏，宋州碭山人。初，從黃巢爲盜，既而降唐，拜爲宣武軍節度使，賜名全忠，未幾進封梁王。挾天子以號令諸侯，竟移唐祚。在位七年，爲子友珪所弑，壽六十一。

附契丹

丁卯，唐天祐四年，四月以後梁太祖朱晃開平元年。

○是歲唐亡，梁、晉、岐、淮南、西川凡五國，吳越、湖南、荊南、福建、嶺南凡五鎮。是時，晉、岐、淮南仍稱天祐，西川稱天復年號，餘皆稟梁正朔，稱臣奉貢。唐昭宣帝禪位於梁，梁

王更名晃，即皇帝位，國號梁，奉帝爲濟陰王。○蜀王遺晉王書云：「請各帝一方。俟朱溫既

平，乃訪唐宗室立之，退歸藩服。」晉王復書不許，曰：「誓於此生靡敢失節。」晉王李克用也。後其子存勗嗣位，遂滅梁，國號唐，即莊宗也。蜀王姓王名建，唐昭宗封爲蜀王，子（翁）（衍）嗣。後唐莊宗同光三年滅之，以孟知祥主其地也。○羅隱說錢鏐舉兵討梁曰：「縱無成功，猶可退保杭、越，自爲東帝，奈何交臂事賊，爲終古之羞乎？」鏐始以隱爲不遇于唐，必有怨心。及聞其言，雖不能用，心甚義之。○唐進士梁震歸蜀，過江陵，高季（興）（昌）愛其才識留之，欲奏爲判官。震耻之，欲去，恐及禍，乃曰：「震素不慕榮宦，明公不以爲愚，必欲使參謀議，但以白衣侍樽俎可也。」季昌許之，終身止稱前進士，不受高氏辟署。○蘇循朝夕望爲相，梁主薄其爲人，敬翔、李振曰：「蘇循，唐之鴟梟，賣國求利，不可以立於維新之朝。」勒令致仕。○岐王治軍甚寬，待士卒簡易，衆心悅服。以兵羸地蹙，不敢稱帝。岐王李茂貞據鳳翔，本姓宋，名文通，僖宗特以功賜姓名。昭宗時封岐王，後唐莊宗改封秦王，子（從）（暉）嗣位，降于後唐而國除。○梁以武安節度使馬殷爲楚王，殷據潭州，盡有湖南之地。歷子希聲、希範、希廣、希萼、希崇五主，至後周太祖廣順間爲南唐所滅。以吳王鏐爲吳越王，錢鏐據杭州，歷子元（權）（瓘）、孫弘佐、弘侑、弘俶四主，至宋太宗興國間，納土入朝而國除。以清海節度使劉隱爲南海王，隱據廣州，盡有嶺表之地。弟襲嗣位稱帝，國號漢，傳、玢、晟、鋹三主，至宋開寶間，太祖滅之。以威武節度使王審知爲閩王，審知自黃巢亂據福州，盡有閩嶺福州之地。歷子延翰、延稟、延鈞、繼鵬、延羲、延政六主，至晉高祖開運元年，降于南唐。以權知荆南留後高季昌爲節度使。季昌據江陵，傳子從誨，孫保融、（保）（勗）、繼冲四主，至宋太祖乾德間滅之。○蜀王建議稱帝，將佐皆以爲然。馮

涓獨獻議，請以蜀王稱制，曰：「朝興則未爽稱臣，賊在則不同爲惡。」不從，涓杜門不出。○契丹耶律阿保機始建國元年。

【論策題意便覽】

● 誓此生靡敢失節 要見晉王有不忘王室之心，即其靡法臣節，則其勝於諸雄遠矣。

● 羅隱說錢鏐討梁

● 錢鏐義羅隱

● 梁震不慕榮宦

● 白衣侍樽俎

● 終身止稱前進士

● 蘇循唐之鳴梟

● 馮涓獨獻議

● 朝興則未爽稱臣

● 馮涓杜門不出

戊辰，蜀王建武成元年。○是歲西川稱蜀。凡五國五鎮。晉王克用薨。臨卒，稱其子存勗曰：「此子

志氣遠大，必能成吾事。」時梁兵久圍晉潞州，存勗與諸將謀曰：「上黨潞州，河東之藩蔽，無上

黨，是無河東也。且朱溫所憚者，獨先王耳。聞吾新立，以爲童子未（聞）（閑）軍旅，必有驕怠之心。若簡精兵出其不意，破之必矣。取威定霸，在此一舉。」遂帥兵直抵夾寨，大敗梁兵。梁王驚歎曰：「生子當如李亞子，存勗小名。克用爲不亡矣。至如吾兒，豚犬耳。」

【論策題意便覽】

● 此子必能成吾事

● 上黨河東之藩蔽 見晉王能審進取以成伯功立論。

● 取威定伯在此舉 要見克用有徇國之忠，其子之賢乃天所以助□也。溫無大功德，而滅三百年之唐，其子之逆亦天意歟！

● 生子當如李亞子

胡氏曰：「喪不二事，故《春秋》於背喪而即戎者，皆深譏之。惟其門庭之寇，存亡繫焉。然後從權制而無避，此《費誓》所以得列於典謨命誥之後。若存勗夾寨之戰，君子深有取者，與是類矣。」

【論策題意便覽】

● 費誓立典謨命誥之後

● 李存勗夾寨之戰何如

晉王歸晉陽，休兵行賞，命州縣舉賢才，黜貪殘，寬租賦，撫孤窮，伸冤濫，禁姦盜，境內大治。○淮南張顥弑弘農戚王，立其弟隆演爲留後。楊行密據淮南，其子渥嗣爲弘農郡王，國號吳。歷隆演、

溥，至晉高祖天福二年，爲南唐徐知誥所篡。

○梁主欲襲趙鎮、定，會燕攻趙，梁遣杜廷隱、丁延徽監魏博兵三千分屯深、冀，聲言助趙守禦。趙將石公立戍深州，白趙王鎔拒之。鎔不從，公立出，指城而泣曰：「所謂開門揖盜者也。」及廷隱等襲取深、冀，殺趙戍卒，鎔始命公立攻之，不克。○梁王景仁等進軍栢鄉，晉王自將救之。欲速戰，周德威曰：「鎮、定之兵長于守城，短于野戰，且衆寡不敵，使彼知吾虛實，則事危矣。」王不悅，退卧帳中。張承業入撫王曰：「此豈王安寢時耶？德威老將知兵，其言不可忽也。」王蹶然而興，退保高邑。○晉王大破梁軍於栢鄉，李存璋引步兵乘之呼曰：「梁人亦吾人，父子兄弟餉軍者勿殺。」於是戰士悉解甲投兵而棄之，囂聲動天地。

【論策題意便覽】

● 趙王開門揖盜

● 德威老將知兵

● 晉救趙次於高邑

●梁人亦吾人

壬申，梁郢王友珪弑梁主即位，均王友貞又誅友珪即位。

末帝

名友貞，太祖第三子，初封均王。及友珪弑太祖，乃起兵誅友珪，即帝位。未幾，唐兵來伐，遂自殺而國亡，在位十一年，

壽三十六。

乙亥，

梁貞明元年。○是歲凡五國五鎮。

梁主專任趙巖及德妃兄弟張漢鼎、漢傑等，巖等依勢弄

權，政事日紊，以至於亡。

戊寅，

是歲凡六國四鎮。吳徐知誥爲淮南節度行軍副使。知誥後篡吳，是爲南唐。

知誥事吳王盡恭，

接士大夫以謙，御衆以寬，約身以儉，以吳王之命悉蠲天祐十一年以前逋稅，餘俟豐年乃輸之。

求賢才，納規諫，除姦猾，杜請託，於是士民翕然歸心。雖宿將悍夫，無不悅服。江淮間曠土盡

闢，桑柘滿野，國以富彊。○張承業輔佐晉王，勸課農桑，蓄積金穀，軍府肅清，饋餉不乏。王或

時須錢賜伶人，承業斬之，王乃置酒（渾）〔庫〕中，令子繼岌爲承業舞。承業但贈以帶馬，王指錢

欲之，承業曰：「此錢大王所以養戰士，不敢以爲私禮。」王不悅，語侵之，承業怒曰：「僕非爲子

孫計，惜此庫錢所以佐王成伯業也。不然，主自取用之，何問僕爲？」王怒索劍。曹太夫人聞

之，召王。王惶恐叩頭謝，請承業以分其過，承業不從。未幾，承制授承業開封儀同三司、燕國公，承業不授，稱唐官終身。○契丹城遼陽。今遼東都司是。

【論策題意便覽】

- 徐知誥爲淮南節度行軍副使
- 此錢所以養戰士
- 承業不敢爲私禮
- 庫錢佐王成伯業
- 張承業稱唐官終身

右後梁二主，共一十七年。

後唐紀

莊宗皇帝 名存勗，姓朱邪，沙陀人。先世事唐，賜姓李氏。父克用，平黃巢以功封晉王。及存勗襲封，以兵滅梁，稱國號曰

「後唐」。在位三年，因中流矢而殂，壽三十五。

癸未，唐莊宗李存勗同光元年。○是歲梁亡，晉稱唐。凡五國四鎮。晉王即帝位，國號大唐。梁右先鋒指

揮使康延孝來奔，唐主問以梁事，延孝對曰：「梁地不爲狹，兵不爲少，然聚則不少，分則不多。陛下養勇畜力以俟其分兵，帥精騎五千自鄆州直抵大梁，擒其僞主，旬月之間，天下定矣。」唐主大悅。及聞梁人數道入寇，遂以大軍濟河。至鄆州遇梁兵，一戰敗之，追至東都，擒王彥章斬之，徑趨大梁。梁主窮蹙，謂皇甫麟曰：「李氏吾世讐，理難自降首，不可俟彼刀鋸，卿可斷吾首。」麟泣，遂弑梁主，因自殺。○吳越王錢鏐在軍中未嘗寐，倦極則就圓木小枕，或枕大鈴，寐熟輒欹而寤，名曰「驚枕」。○晉得傳國寶，將佐皆奉觴稱賀。張承業曰：「吾王世世忠于唐室，今河北甫定，朱氏尚存而王遽即大位，殊非從來征伐之意，天下其誰不解體乎？王何不先滅朱氏，復列聖之深仇，然後求唐後而立之。南取吳，西取蜀，合爲一家。當是之時，雖使高祖、太宗復生，誰敢居主上者？老奴之志無他，但以受先王大恩，欲爲王立萬年之基耳。」○唐主幼善音律，故伶人多有寵。唐主或時自傅粉墨，與優人共戲於庭，以悅劉夫人，優名謂之「李天下」。諸伶人出入宮掖，侮弄縉紳，群臣憤嫉，莫敢出氣。

【論策題意便覽】

● 延孝勸收大梁

● 小枕大鈴

● 錢鏐驚枕

● 世世忠於唐室

● 殊非從來征伐之意

● 爲王立萬年之基

● 李天下

甲申，是歲岐降後唐。凡四國四鎮。唐主內府錢山積，不肯給賜。於是軍士皆不滿望，始怨恨有離心矣。○唐郭崇韜位兼將相，復領節旄，以天下爲己任，權侔人主。由是嬖倖嫉之於內，勳舊怨之於外。

乙酉，唐以郭崇韜帥兵伐蜀，滅之。時成都雖下，而蜀中盜賊群起，崇韜恐大軍既去，更爲後患，於是分道招討，以是淹留未還。唐主遣宦者向延嗣促之，崇韜待之倨。延嗣歸，言崇韜專權，唐主詔殺崇韜，以孟知祥爲西川節度使。明宗時，封知祥爲王，後自稱帝。子昶嗣，至宋太祖乾德間滅之。

明宗皇帝

本胡人。初名邈佶烈，爲晉王李克用養子，更名嗣源。及莊宗遇弒，諸將立爲帝，在位八年，壽六十七。

丙戌，明宗李嗣源天成元年，吳越寶正元年。○是歲蜀亡，閩建國，凡四國三鎮。唐趙在禮反于鄴，命李嗣源討之。嗣源至鄴都，從馬直軍士張破敗作亂，帥衆大譟，逼中軍，曰：「將士從主上百戰以得天下，今主上棄恩任威，云克城之後當盡坑魏博之軍。今衆議欲擊退諸道軍，請主上帝河

南，令公帝河北，爲軍民之主。」嗣源泣諭之，不從。康義誠曰：「主上無道，軍民怨怒，公從衆則生，守節則死。」嗣源乃令安重誨移檄會兵。唐主幸關東招撫，從馬直指揮使郭從謙作亂，唐主爲流矢所中殂。嗣源入洛陽，於柩前即皇帝位。○時議置相，孔循薦鄭珏、崔協，而任圜欲用李琪。珏素惡琪，故循力沮之，謂安重誨曰：「李琪非無文學，但不廉耳。宰相但得端重有器度者，足以儀刑多士矣。」他日議于朝，唐主曰：「吾在河東時，馮書記書記官名，乃馮道也。多才博學，與物無競，此可相矣。」他日重誨謂圜曰：「今方乏人，協且備員可乎？」圜曰：「明公舍李琪而相崔協，是猶棄蘇合之丸，取蜣蜋之轉也。」竟以循、協爲相。○楚入貢于唐，過江陵，高季興奪之，自附於吳。徐溫曰：「爲國者當務實效而去虛名，洛陽去江陵不遠，唐襲之易而我救之難。夫臣人而弗能救，使之危亡，能無愧乎？」乃受其貢物，辭其稱臣。○唐主目不知書，四方奏事皆令安重誨讀之，重誨亦不能盡通。乃奏願倣前朝侍講、侍讀，近代直崇政、樞密院，選文學之臣與之共事，以備應對。乃置端明殿學士，以翰林學士馮道、趙鳳爲之。

【論策題意便覽】

- 將士從主上百戰以得天下
- 宰相足以儀刑多士

● 馮書記與物無競

● 棄蘇合丸取蛄蜺之轉

● 爲國者務實效而去虛名

● 置端明殿學士

己丑，唐主與馮道從容語及年穀屢登，四方無事。道曰：「臣昔在先皇幕府，奉使中山，歷井陘之險，臣憂馬蹶，執轡甚謹，幸而無失。逮至平路，放轡自逸，俄而顛隕。凡爲天下者，亦猶是也。」唐主深以爲然。又問道：「今歲雖豐，百姓贍足否？」道曰：「農家歲凶則死於流殍，歲豐則傷於穀賤，豐凶皆病者，惟農家爲然。臣記進士聶夷中詩云：『二月賣新絲，五月糶新穀。』醫得眼前瘡，剗却心頭肉。」語雖鄙俚，曲盡田家之情狀。農於四人之中最爲勤苦，人主不可不知也。」○王晏球克定州，王都伏誅。晏球在定州城下，日以私財享士，自始攻至克城，未嘗戮一卒。三月入朝，唐主美其功。

【論策題意便覽】

- 四人中最爲勤苦 要見四民皆所當恤，而惟農尤當加意，末要繳不以人廢言意。
- 曲盡田家情狀 重在有國者不可不知此詩中之意味，末繳不可因道以人廢言意。